



UKA 2018/168

30/10-2018

Steen Lyngé

**Nunatta kujataani aalisarnermut nunamilu inuussutissarsiornikkut periarfissanik tikkuuallunilu suussusersisussamik Naalakkersuisut UKA2019-imi saqqummiunneqartussamik nassuiaasiornissaat pillugu Inatsisartuni aalajangiiffigisassatut siunnersuut.**

(Inatsisartuni ilaasortaq Aqqaluaq B. Egede, Inuit Ataqtigiit)

(Siullermeenera)

Kujataani inuutissarsiutit ineriartortinnissaat pisariaqartinneqarpoq! Taamaattumik siunertaq pitsaasuvoq, Inatsisartunut ilaasortaq Aqqaluaq B. Egede, IA, siunnersuuteqarmat, Nunatta kujataani aalisarnermut nunamilu inuussutissarsiornikkut periarfissanik tikkuuallunilu suussusersisussamik Naalakkersuisut UKA2019-imi saqqummiunneqartussamik nassuiaasiornissasut.

Oqareernittut Nunatta Kujataani ineriartortitsinissaq pisariaqartinneqarpoq. Demokraatini isumarput naapertorlugu pingaaruteqarpoq inuiaqtigiit taamaasillunilu Namminersorlutik Oqartussat Nunatta Kujataani inuutissarsiorneq siuariartorsinnaaqullugu pisariaqartinneqartunik sinaakkutinik pilersitsinissaat. Oqaraangattalu sinaakkutit, taava Demokraatini pisarpagut inatsisitigut, allaffissornikkut angallannikkullu sinaakkutissat.

Inatsisartut inatsisiliussapput nunami maani inuutissarsiorneq pitsaasumik ingerlanissaanut sinaakkusersuillutik inuiaqtigiit tamarmik iluaqtissaannik. Inatsisit ima iluseqassapput, paasiuminartuussallutik ersarissuullutillu, inuutissarsiortut sinaakkutit assigiit tunngavigalugit ilusilersuisinnaaqullugit. Inatsisit allatut oqaatigalugu inuutissarsiortunut pilersitsissapput atugassanik patajaatsunik assigiinnillu.

Inatsisit inuutissarsiortunut sinaakkutinik pitsaasunik pilersitseqqullugit pisariaqarpoq taakku aqunneqarnerisa sukkaasumik pitsaasumillu pisarnissaat. Allaffissorneq aporfilersuissanngilaq sivisoorujussuarmik sullissisarlungi aamma assigiinngitsuliortarluni.



Taamatuttaaq aamma pingaaruteqarpoq nunami angallannerup pitsaasuunissaa Kalaallit Nunaanni inuutissarsiortut assigiinngitsut ingerlatsinissaminnut pitsaasunik sinaakktissaqaqqullugit. It-teknologi, assartuineq aamma umiarsualiviit mittarfiillu pisariaqartinneqartut angallannermut pingaaruteqarput, iluamik ingerlasussat peqqinnartumik inuutissarsiortut ineriartorsinnaaqqullugit.

Tamanilli pingaarnerpaajuvoq Inatsisartut pitsaasunik patajaatsunillu sinaakktissat pilersitsinissaaq tamatumunngalu pisariaqartineqarpoq politikki patjaatsoq, qinersinermiit qinersinermut allangorarani. Pisariaqarpoq nunap politikikkut qonusuittumik piumassuseqartumillu ingerlanneqarnissaa peqataanik takorluuisinnaassuseqarluni.

Demokraatini isumaqarpugut inuutissarsiorneq taamaallaat inuutissarsiortunit ineriartortinneqarsinnaasoq aamma ineriartortinneqassasoq, tassa imaappoq inuutissarsiortut nammineq ineriartortitsissapput. Inuutissarsiortut nalunnginneruaat suut aningaasaliiffigerusunnerlugit. Inuutissarsiortut kisiamik nalunngilaat aporfissat suut navialissutigisinnaallugit inuutissarsiummik ineriartortitsinerup nassatariuartagai taamaakkaluartorli aamma ajunngitsorsiassaqartarpoq ineriartitsilluarneq iluanaarutigineqarsinnaaleraangat. Inuutissarsiut pinngitsaalillugu ineriartortinneqarsinnaanngilaq, arlaannaannulluunniit akilersinnaanngippat.

Nassuiaatit amerlanerit pisariaqartinngilagut.

Inuutissarsiortut namminneq nalunngilaat qaqugu sumilu aningaasaliissanerlutik aamma Nunatta Kujataani. Kujataani ullumikkut aatsitassarsiornissamut periarfissat arlaqarput. Ingerlatseqatigiiffiit arlallit utaqqipput aamma Nunatta Kujataani inuutissarsiummik ingerlatsilernissaminnut ukiorpassuarni utaqqinikuupput.

Nunatta kujataani aalisarneq Nunatta qeqqatut aamma avannaatut ineriartunngilaq. Demokraatini isumaqarpugut kujataani aalisarnerup ineriartunnginneranut pissutaanngitsoq innuttaasut piginnaanikinneri imaluunniit piumassusikinneri. Naammaatumik ineriartortoqannginneranut pissutsit allaapput, Qeqqani Avannaanilu atuutinngitsut. Sinerissamut qanittumi aalisaneq killeqarpoq tamannalu pissuteqarpoq peqassutsit killeqarnerannik aamma Nunatta Kujataani pissutsit immikkuullarinnerat.



Aalisarneq ineriartortinneqassaaq akuusut pissusaat tunngavigalugit. Assersuutigalugu aningaasartuutaasussanik inuutissarsiortunut nammakkiinissat soorlu avataasiortut nunamut tulaassisussaataitanerannut tunngasut, akuusut unammilersinnaassusaannik innarliissaaq. Aningaasaliissuteqarnissamut tamakku kajumissaataanngivipput.

Taamaattumik suliniutit taamaattut pisimasunik soqutiginninnermik aallaaveqanngitsut Demokraatini tapersorsinnaanngilagut.

Demokraatini isumaqarpugut siunnersuutigineqartutut nassuiaasiornissap Nunatta Kujataani inuutissarsiornerup ineriartornissaanut siursaataanavianngitsoq. Inuutissarsiortut aamma kujataani innuttaasut nalunnginneruaat ullutsinni suut periarfissaanersut.

Inatsisartut aamma Naalakkersuisut paarlattuanik inatsisitigut sinaakktissanik pitsaasunik pilersitsissapput aamma aqutsineq pitsaasuusaaq. Inuutissarsiortut taamaaliornikkut atugaat pitsaanerulissapput. Nassuiaasiornierup tamanna ilumoortoq allanngortinnavianngilaa. Taamaattumik Demokraatini isumaqatiginngilarput pisortat aningaasaliinissaat amerlanerusunik, nassuiaasiornissap suliarineranut atatillugu allaffissornerup annertusinissaanut.

Taamatut oqaaseqarluta Demokraatini siunnersuut itigartipparput.